

tem, cum subdit : *hic vero nihil mali fecit;*
quasi dicat : novam vide injuriam : honestatem
damnari cum scelere : nos viventes
occidimus, hic mortuos suscitavit; nos aliena
sumus furati, hic et sua jubet tribuere. (*Chrysostomus.*)

II. — Et dicebat ad Jesum : Domine
memento mei, cum veneris in regnum
tuum. (*Luc. XXIII. 42.*)

Beatus igitur latro adstantes docebat, talia
disserens quibus alterum increpabat. Sed
ut videt extintos auditus adstantium, reddit
consequenter ad eum qui novit præcordia :
Et dicebat ad Jesum, etc. Crucifixum adspicis,
et Dominum profiteris : condemnati vides
figuram et regis prædicas dignitatem : mille
malis imbutis postulas justitiæ fontem re-
minisci tuæ nequitiae. Sed dices : Video qui-
dem apparens opprobrium, sed intueor la-
tens regnum : et tu avertis mea publica
sclera, et acceptas fidem intentionis occulta.
Discipulum veritatis usurpavit nequitia,
discipulum nequitiæ non commutabit veri-
tas? (*Chrysostomus.*)

III. — Et dixit illi Jesus : Amen dico
tibi : Hodie tecum eris in paradyso.
(*Luc. XXIII. 43.*)

Pulcherrimum autem datur affectandæ
conversionis exemplum, quod tam cito la-

troni venia relaxatur. Cito ignoscit Dominus, quia cito ille convertitur, et uberior est
gratia quam precatio : semper enim Dominus plus tribuit quam rogatur. Ille rogabat
ut memor sui esset : de Domino autem se-
quitur : *Amen dico tibi, Hodie tecum eris in*
paradyso. Vita est enim esse cum Christo :
et ubi Christus ibi regnum. (*Ambrosius.*)

MEDITATIO CCCVIII.

Christus dat matrem discipulo.

I. — Stabant autem juxta crucem Iesu
mater ejus, et soror matris ejus, Maria
Cleophae, et Maria Magdalene. (*Joan.*
XIX. 25.)

Cum aliæ mulieres adstarent, nullius
alterius meminit nisi matris, docens nos
plus aliquid matribus præbere. Sicut enim
parentes, circa spiritualia adversantes, neque
nosse oportet; ita quando nihil impediunt,
omnia decet eis præbere. (*Chrysostomus.*)

II. — Cum vidisset ergo Jesus matrem,
et discipulum stantem, quem diligebat,
dicit matri suæ : Mulier, ecce filius tuus.
(*Joan. XIX. 26.*)

Papæ! quanto discipulum honoravit ho-
nore! Sed ipse seipsum occultat, moderate

sapiens : si enim vellet gloriari, et causam utique adjecisset propter quam amabatur : etenim conveniens est magnam quamdam et mirabilem esse causam. Ideo autem nihil aliud Joanni loquitur, neque consolatur tristantem, quoniam tempus non erat verborum consolationis. Sed neque parum erat honorari eum tali honore. (*Chrysostomus.*)

III. — Deinde dicit discipulo : Ecce mater tua. Et ex illa hora accepit eam discipulus in sua. (*Joan. XIX. 27.*)

Quia vero conveniens erat, matrem existentem dolore oppressam procreationem quererere, quia ipse aberat : discipulo qui diligebatur tradidit diligentiam habituro. (*Chrysostomus.*)

Quia ergo matri quam relinquebat, alterum pro se filium quodammodo providebat, cur hoc fecerit ostendit in hoc quod subditur. *Et ex illa hora accepit eam discipulus in sua.* Sed in quæ sua Joannes matrem Domini accepit? Neque enim non ex eis erat qui dixerunt ei : (*Matth. XIX.*) “Ecce nos dimisimus omnia et secuti sumus te.” Suscepit ergo eam in sua non prædia, quæ nulla propria possidebat, sed officia, quæ propria dispensatione exequenda curabat. (*Augustinus.*)



MEDITATIO CCCIX.

Quatum verbum Christi in cruce.

I. — Erat autem fere hora sexta, et tenebræ factæ sunt in universam terram usque in horam nonam. Et obscuratus est sol. (*Luc. XXIII. 44, 45.*)

A sexta autem hora tenebræ factæ sunt, super universam terram usque ad horam nonam. (*Matth. XXVII. 45. — Marc. XV. 33. — Luc. XXIII. 44.*)

Non poterat ferre creatura injuriam creatoris : unde sol retraxit radios, ne videret impiorum facinora. (*Chrysostomus.*)

Hoc igitur prodigium factum est, ut patret quod qui mortem suscepérat, gubernator esset totius creaturæ. (*Græcus.*)

Sol etiam occidit sacrilegis, ut funesti spectaculum sceleris obumbraret : tenebræ effusæ sunt oculis perfidorum, ut fidei lumen resureret. (*Ambrosius.*)

II. — Et circa horam nonam clamavit Jesus voce magna dicens : Eli, Eli, lamma sabacthani? hoc est : Deus meus, Deus meus, ut quid dereliquisti me? (*Matth. XXVII. 45. — Marc. XV. 34.*)

Salvator hoc dixit, nostros circumferens motus qui in periculis positi, a Deo deserí

nos putamus. Humana enim natura propter peccatum a Deo fuerat derelicta : sed quia Filius Dei factus est noster advocatus, quorum suscepit culpam, deplorat miseriam : in quo ostendit quantum flere debeant qui peccant, quando sic flevit qui nunquam peccavit. (*Rabanus.*)

III. — Quidam autem illic stantes, et audientes, dicebant : Eliam vocat iste. (*Matth. XXVII. 47. — Marc. XV. 35.*)

Non omnes sed quidam, quos arbitror milites fuisse romanos, non intelligentes Hebraici sermonis proprietatem : sed ex eo quod dixit, *Eli, Eli*, putant Eliam ab eo invocatum. Sin autem Judaeos qui hoc direxerint intelligere voluerimus, hoc more sibi solito fecisse, ut Dominum imbecillitatis infamem, qui Eliae auxilium deprecetur. (*Hieronymus.*)

MEDITATIO CCCX.

Christus sitiens potatur aceto.

I. — Postea sciens Jesus, quia omnia consummata sunt, ut consummaretur Scriptura, dixit : Sitio. (*Joan. XIX. 28.*)

Patiebatur haec omnia qui apparebat homo, et ipse disponebat haec omnia qui late-

bat Deus : unde dicitur : *sciens*, etc. *ut consummaretur Scriptura*, idest quod Scriptura prædixerat : (*Psal. LXVIII.*) “Et in siti mea potaverunt me aceto” dixit : *Sitio.* (*Augustinus.*)

II. — Vas ergo erat positum aceto plenum. (*Joan. XIX. 29.*)

Et continuo currens unus ex eis acceptam spongiam implevit aceto, et impo-
suit arundini, et dabat ei bibere. (*Matth. XXVII. 48.*)

Dicens : Sinite, videamus, si veniat Elias ad deponendum eum. (*Mari. XV. 36.*)

Ceteri vero dicebant : Sine videamus an veniat Elias liberans eum. (*Matth. XXVII. 49.*)

Ex temporis illius more, parata fuerant in Calvario monte acetum, spongiam, hyssopum; ut si opus esset spongia plena aceto, quod hyssopo esset infectum, vulneribus crucifixorum admoveretur ad sistendum san-
guinem, ne scilicet nimis cito cruciarii morerentur; habet enim hyssopus, ut etiam spongia et acetum, vim sanguinis sistendi. (*Baronius, anno XI. no 126.*)

Hyssopum autem cui circumposuerunt spongiam aceto plenam, quoniam herba est humiliis et pectus purgat, Christi humilita-

tem congruenter accipimus; quam circumdederunt et se circumvenisse putaverunt, Christi namque humilitate mundamur. Nec moveat quomodo spongiam ori ejus potuerunt admoveare qui in cruce fuerat exaltatus a terra : sicut enim apud alios evangelistas legitur, quod Joannes prætermisit, in arundine factum est, ut in spongia talis potus ad crucis sublimia levaretur. (*Augustinus.*)

III. — Illi autem spongiam plenam aceto, hyssopo circumponentes, obtulerunt ori ejus. (*Joan. XIX. 29.*)

Sic ergo propinuator fontium potatur aceto, mellis dator cibatur felle, flagellatur remissio, condemnatur venia, illuditur majestas, ridetur virtus, perfunditur largitor imbrum sputis. (*Chrysostomus.*)

MEDITATIO CCCXI.

Christus commendat spiritum in manus Patris et exspirat.

I. — Cum accepisset Jesus acetum dixit : Consummatum est. (*Joan. XIX. 30.*)

Quid, *Consummatum*, nisi quod prophetia tanto ante prædicterat? (*Beda.*)

Cum ergo nil jam Christo restaret ex poenis, mors moratur, quia suum esse ibi nil

sentit; suspecta est vetustati novitas. Hunc primum, hunc solum vidit hominem peccati nescium, noxa liberum, juris sui legibus nil debentem. (*Augustinus.*)

II. — Jesus autem iterum clamans voce magna (*Matth. XXVII. 50.*) ait : Pater, in manus tuas commendo spiritum meum. (*Luc. XXIII. 46.*)

Deinde ubi acetum babit, assumptæ mortalitatis impletum est omne mysterium, et immortalitatis sola lætitia remansit : unde sequitur : Pater, in manus tuas commendo spiritum meum. (*Ambrosius.*)

Hæc autem vox edocet, quod animæ sanctorum non deinceps in inferno claudantur, ut prius; sed apud Deum sunt, hujus rei factio Christo principio. (*Cyrillus.*)

Commendat enim Patri, per se, universos mortales in se vivificatos : nam sumus membra ejus secundum illud Apostoli ad (*Gal. III.*) “ Omnes unus estis in Christo. ” (*Athanasius.*)

III. — Et inclinato capite tradidit spiritum. (*Joan. XIX. 30.*)

Non autem quoniam exspiravit, inclinavit caput, sed quia inclinavit caput, tunc exspiravit : per quæ omnia indicavit Evangelista, quoniam omnium Dominus ipse erat. (*Chrysostomus.*)

Quis enim ita dormit quando voluerit,
sicut Jesus mortuus est quando voluit?
Quanta speranda, vel timenda potestas est
judicantis, si apparuit tanta morientis? (*Augustinus.*)

MEDITATIO CCCXII.

De prodigiis in morte Domini.

I. — Velum templi scissum est medium. (*Luc. XXIII. 45.*) In duas partes, a summo usque deorsum. (*Matth. XXVII. 51.* — *Marc. XV. 38.*)

Per hoc autem Dominus ostendebat, quod non erunt ulterius sancta Sanctorum inaccessibilia: sed tradita in manus Romanorum inquinarentur, et eorum aditus patetur. (*Theophylactus.*)

Per hoc etiam ostenditur quod velum, quod sequestrabat nos a sacris quae sunt in celo, disrumpitur, idest Dei inimicitia et peccatum. (*Theophylactus.*)

II. — Terra mota est et petrae scissæ sunt. (*Matth. XXVII. 51.*)

Est autem, ad testimonium venerandæ passionis sufficiens signum, elementorum inopinata turbatio. (*Leo Papa.*)

Nulli enim dubium est quid significet

MEDITATIO CCCXII.

775

juxta litteram magnitudo signorum; ut crucifixum Dominum suum et celum et terra et omnia demonstrarent. (*Hieronymus.*)

Movetur terra quia capax hujus mortui esse non poterat: *petre scissæ sunt*, omnia enim valida et fortia penetrans Dei verbum, et potestas æternæ virtutis irruperat. (*Hilarius.*)

III. — Monumenta aperta sunt: et multa corpora sanctorum, qui dormierant, surrexerunt.

Et exentes de monumentis post resurrectionem ejus, venerunt in sanctam civitatem, et apparuerunt multis. (*Matth. XXVII. 52, 53.*)

Et monumenta aperta sunt. Erant enim mortis claustra reserata. *Et multa corpora sanctorum*, etc. Illuminans enim mortis te nebras, et infernorum obscura collustrans mortis spolia detrahebat. (*Hilarius.*)

Et tamen cum monumenta aperta sunt, non ante resurrexerunt quam resureret Dominus, ut esset primogenitus resurrectionis ex mortuis. (*Hieronymus.*)

Quæret autem aliquis, quid de illis factum sit qui resurgentे Domino surrexerunt. Incunctanter credere debemus, quia qui resurgentе Domino a mortuis resurrexerunt, ascendentе eo ad celos et ipsi pariter ascenderunt. (*Remigius.*)

MEDITATIO CCCXIII.

Centurio et alii glorificant Deum.

I. — Videns autem centurio quod factum fuerat, glorificavit Deum, dicens : Vere hic homo justus erat. (*Luc. XXIII. 47.*)

Videns centurio, qui ex adverso stebat, quia sic clamans exspirasset, ait : Vere hic homo Filius Dei erat. (*Marc. XV. 39.*)

Manifesta autem causa miraculi centurionis exponitur, quod videns Dominum sic exspirasse idest spiritum emisso dixerit : *Vere hic homo Filius Dei erat* : nullus enim habet potestatem mittendi spiritum, nisi qui animarum conditor est. (*Beda.*)

Novissimi autem nunc primi efficiuntur, Gentilis confitetur populus, Judea cæcata negat, ut fiat eis error pejor priore. (*Hieronymus.*)

II. — Centurio et qui cum eo erant, custodientes Jesum, viso terræ motu et his, quæ fiebant, timuerunt valde dicentes : Vere Filius Dei erat iste. (*Matth. XXVII. 24.*)

Non est contrarium quod Matthæus, viso terræ motu dicit admiratum centurionem

et eos qui cum eo erant, cum Lucas dicat hoc admiratum, quod emissa magna voce exspirasset : in eo enim quod Matthæus non solum dixit, *viso terræ motu*, sed et addidit, *his quæ fiebant*, integrum locum fuisse demonstravit Lucae, ut diceret Centurionem ipsam Domini mortem fuisse miratum : quia et hoc inter illa est quæ tunc mirabiliter facta erant. (*Augustinus.*)

III. — Et omnis turba eorum, qui simul aderant ad spectaculum istud, et videbant quæ fiebant, percutientes pectora sua revertebantur. (*Luc. XXIII. 48.*)

Quod percutiebant pectora; quia poenitentia et luctus indicium est, potest dupliciter intelligi : sive enim eum cuius vitam dilexerunt, injuste occisum dolebant; sive cuius mortem se impetrasse meminerant, hunc in morte amplius glorificatum trebant. Notandum autem, quod Gentiles Deum timentes, apertæ confessionis voce glorificant : Judæi, percutientes solum pectora, silentes domum redeunt. (*Beda.*)

MEDITATIO CCCXIV.

Piorum studium erga Christum.

I. — Stabant autem omnes noti ejus a longe : et mulieres, quæ secutæ erant

a Galilaea hæc videntes. (*Luc. XXIII. 49.*)

Sed seminarum genus olim maledictum, manet et videt hæc omnia, et sic primea refocillantur justificatione, aut benedictione a passione profluente sicut et resurrectione. (*Theophylactus.*)

Hæc autem mulieres considerabant quæ gerebantur, quæ maxime erant compassibiles : et quæ sequebantur ministrantes usque ad pericula, affuerunt maximam fortitudinem ostendentes : quia cum discipuli fugerunt, ipsæ affuerunt. (*Chrysostomus.*)

II. — Erant autem ibi mulieres multæ a longe, quæ secutæ erant Jesum a Galilæa, ministrantes ei. (*Matth. XXVII. 22.*)

Consuetudinis enim Judaicæ fuit, nec ducebatur in culpam more gentis antiquo; ut mulieres, de substantia sua, victimum atque vestitum preceptoribus ministrarent.

Hoc, quia scandalum facere poterat in Gentibus, Paulus abjecisse se memorat. Ministrabant autem Domino de substantia sua, ut meteret illarum carnalia, cuius illæ metebant spiritualia : non quia indigebat cibis Dominus creaturarum : sed ut typum ostenderet magistrorum, quia victu atque vestitu ex discipulis deberent esse contenti.

Sed videamus quales comites habuerit. (*Hieronymus.*)

III. — Inter quas erat Maria Magdalene, et Maria Jacobi, et Joseph mater, et mater filiorum Zebedei. (*Matth. XXVII. 26. — Marc. XV. 40.*)

Et cum esset in Galilæa, sequebantur eum, et ministrabant ei, et aliae multæ, quæ simul cum eo ascenderant Jerosolymam. (*Marc. XV. 41.*)

Maria Magdalene, soror Lazari et Marthæ. *Maria Jacobi*, Jacobi minoris et Joseph mater, quæ etiam dicitur *Maria Cleophae*, scilicet uxor Cleophae. Hæc erat beata Virginis soror : vel ut alii volunt soror Josephi sponsi B. Virginis. *Mater filiorum Zebedæi*, quæ alibi dicitur Salome. (*Menochius.*)

Et aliae multæ. Et sic ordo convertitur, dum Judæi occidunt et Gentilis confitetur : discipuli fugiunt, et mulieres exspectant. (*Theophylactus.*)

I. — Judæi (quoniam Parasceve erat) ut non remanerent in cruce corpora sabbato, (erat enim magnus dies ille sabbati) rogaverunt Pilatum ut frangerentur eorum crura et tollerentur. (*Joan. XIX. 31.*)

Judæi qui camelum transglutiebant, calicem autem colabant, cum tantam fuissent operati audaciam, de die diligenter ratiocinantur. (*Chrysostomus.*)

Parasceve, id est præparatio, dicta est sexta feria, quia eo die duplices sibi cibos filii Israel præparabant. *Erat enim magnus dies ille Sabbati;* scilicet propter solemnitatem paschalem. (*Beda.*)

Rogaverunt Pilatum, etc. Non crura tolerentur, sed hi quibus ideo frangebantur ut morerentur, ex ligno; ne pendentes in crucibus magnum diem festum sui diurni cruciatus horrore fœdarent. (*Augustinus.*)

II. — Venerunt ergo milites : et primi quidem fregerunt crura, et alterius qui crucifixus est cum eo. (*Joan. XIX. 32.*)

Sic enim jubebatur in lege, non occidere solem in hominis suppicio : vel quia noluerunt, in die festo, tortores aut homicidae censi. (*Theophylactus.*)

III. — Ad Jesum autem cum venissent, ut viderunt eum jam mortuum, non fregerunt ejus crura.

Sed unus militum lancea latus ejus aperuit, et continuo exivit sanguis et aqua. (*Joan. XIX. 33, 34.*)

Ut Judæis complaceant, lanceant Christum, circa corpus exanime contumelias in-

ferentes : sed contumelia in signum prodiit : sanguinem enim de corpore extincto manare miraculum est. (*Theophylactus.*)

Et quia hinc suscipiunt principium sacra mysteria; cum accesseris ad tremendum calicem, ut ab ipsa bibiturus Christi costa, ita accedas. (*Chrysostomus.*)

Hæc aqua (vera aqua naturalis) miraculo in corpore Christi creata, baptismum significavit, quod est janua sacramentorum ; sanguis vero Eucharistiam; in quibus etiam alia sacramenta Ecclesia significantur, quæ, ut loqui solemus, e Christi latere fluxerunt. (*Menochius.*)

IV. — Et qui vidit, testimonium perhibuit et verum est testimonium ejus. Et ille scit quia vera dicit : ut et vos credatis.

Facta sunt enim hæc ut Scriptura impleretur : Os non comminuetis ex eo.

Et iterum alia Scriptura dicit : Videbunt in quem transfixerunt. (*Joan. XIX. 35, 36, 37.*)

Potest tamen quis calumniare dicere, quod aliqua virtus vitalis erat in corpore, et ideo sanguis effluxit : aqua vero manans inexpugnabile signum fuit : et ideo Evangelista subjungit : *Et qui vidit, testimonium perhibuit.* (*Theophylactus.*)

Quasi dicat : Non ab aliis audivit, sed ipse præsens vidit. *Et verum est testimonium ejus* : quod convenienter subjungit, convicium Christi enarrans. Non magnum aliquid et admirabile signum, ut sic suspensus sermo redderetur : sed ipse hoc dixit, haereticorum ora præcludens et futura personans mysteria, et eum qui latebat in eis inspiciens thesaurum. (*Chrysostomus.*)

MEDITATIO CCCXVI.

Pietas Josephi ab Arimathæa.

I. — Cum jam sero esset factum quia erat parasseve, quod est ante sabbatum.

Venit Joseph ab Arimathæa (*Marc. XV. 42.*) civitate Judææ. (*Luc. XXIII. 21.*) Homo dives. (*Matth. XXVII.*) Nobilis decurio. (*Marc. XV. 43.*) Vir bonus et justus. (*Luc. XXIII. 20.*) Qui et ipse discipulus erat Jesu. (*Matth. XXVII. 27.*) Occultus autem propter metum Judæorum. (*Joan. XIX. 38.*) Qui exspectabat et ipse regnum Dei. Hic non consenserat consilio et actibus eorum. (*Luc. XXIII. 21.*)

Iste autem Joseph, secundum sæculi statum, magnæ fuit dignitatis : sed multo ma-

joris meriti apud Deum fuisse laudatur, siquidem justus fuisse describitur. Decebat quippe eum talem existere qui corpus Domini sepeliret, quatenus per justitiam meritorum dignus esset tali officio. (*Remigius.*)

Dives autem refertur non de jactantia scriptoris, quo virum nobilem atque ditissimum referat Jesu fuisse discipulum ; sed ut ostendat causam quare a Pilato corpus Christi potuerit impetrare. (*Hieronymus.*)

II. — Hic accessit ad Pilatum. (*Matth. XXVII. 28.* — *Luc. XXIII. 22.*)

Et audacter introivit ad Pilatum, et petti corpus Jesu. (*Marc. XV. 43.* — *Matth. XXVII. 28.* — *Luc. XXIII. 22.*) Rogavit autem Pilatum ut tolleret corpus Jesu. (*Joan. XIX. 33.*)

Merito autem movet cur ille qui propter timorem occultus erat discipulus, ausus sit petere corpus ejus, quod nullus eorum qui eum palam sequebantur auderet. Sed intelligendum est istum, fiducia dignitatis hoc fecisse, qua prædictus poterat familiariter intrare ad Pilatum. In extremo autem illo officio funeris exhibendo, minus videtur currasse de Judæis; quamvis soleret in Domino audiendo eorum inimicitias devitare. (*Augustinus.*)

III. — Pilatus autem mirabatur si jam obiisset. Et accersito centurione, interrogavit eum si jam mortuus esset.

Et cum cognovisset a centurione, donavit corpus Joseph. (*Marc. XV. 44, 45.*)

Tunc Pilatus jussit reddi corpus. (*Matth. XXVII. 28.*)

Putabat enim (Pilatus) quod diu viveret in cruce, sicut et latrones in patibulo vivebant diu. (*Theophylactus.*)

Jussit, Pilatus, *reddi corpus*, cum tamen prius ex centurione cognovisset Christum mortuum esse : cavit enim ne qua fraus fieret et supplicio vivus eriperetur. (*Menchius.*)

MEDITATIO CCCXVII.

Pietas et liberalitas Nicodemi erga Christum.

I. — Joseph autem mercatus sindonem. (*Marc. XV. 46.*)

Venit et tulit corpus Jesu. (*Joan. XIX. 38.*)

Pretiosum corpus pretiose sepeliens : cum enim esset discipulus Domini, sciebat qualiter corpus Domini honorari deberet. (*Theophylactus.*)

Hinc Ecclesiæ mos obtinuit ut sacrificium altaris, non in serico, neque in panno tinctorio, sed in lino terreno celebretur, sicut corpus est Domini in sindone munda sepulatum : juxta quod in gestis Pontificalibus a beato Sylvestro legimus esse statutum : quamquam et hoc significet, quod ille sindone munda involvit Jesum qui pura eum mente suscepit. (*Beda.*)

II. — Venit autem et Nicodemus, qui venerat ad Jesum nocte primum, ferens mixturam myrræ, et aloes, quasi libras centum. (*Joan. XIX. 39.*)

Adjungitur autem ei et Nicodemus, (*Beda.*)

Venerat ad Jesum Nicodemus nocte primum, quod idem Joannes narravit in prioribus Evangelii sui partibus. Hic ergo intelligendum est ad Jesum, non tunc solum, sed tunc *primum* venisse Nicodemum ; venisse autem postea, ut fieret audiendo discipulus Christi. (*Augustinus.*)

Ferunt autem pigmenta, quæ maxime corpus apta sunt quamplurimum conservare, et non permittere cito subjici corruptioni : adhuc enim de nudo homine disponebant, sed tamen multam dilectionem demonstrabant. (*Chrysostomus.*)

III. — Acceperunt ergo corpus Jesu, et ligaverunt illud linteis cum aromati-

bus, sicut mos est Judæis sepelire. (*Ioan. XIX. 40.*)

In quo Evangelista admonuit in hujusmodi officiis quæ mortuis exhibentur, mortem cujusque gentis esse servandum. Erat autem illius gentis consuetudo ut mortuorum corpora variis aromatibus condirentur, ut diutius serventur illæsa. (*Augustinus.*)

MEDITATIO CCCXVIII.

De sepultura Domini nostri Jesu Christi.

I. — Erat autem in loco, ubi crucifixus est, hortus : et in horto monumentum, in quo nondum quisquam positus erat. (*Joan. XIX. 41.*)

Quia vero brevitate temporisurgebantur : nona enim hora mortuo Christo, deinde accedentibus ad Pilatum, et deponentibus Christi corpus, vespera imminebat.

Erat in loco ubi crucifixus est, etc., in quo nondum quisquam positus fuerat : quod dispensatione factum est, ne alterius aliquis, qui cum eo jaceret, aestimaretur resurrectio facta esse.

II. — Et posuit illud (corpus Jesu) in monumento suo novo, quod exciderat in

petra. Et advolvit saxum magnum ad ostium monumenti, et abiit. (*Matth. XXVII. 60.*)

Sicut etiam in Mariæ Virginis utero nemo ante illum, nemo post illum conceptus est : ita in hoc monumento nemo ante illum, nemo post illum sepultus est. (*Augustinus.*)

Per hoc etiam quod novum fuit sepulcrum, mystice datur intelligi quod per Christi sepulturam omnes innovamur, morte et corruptione destructa. Attende etiam abundantiam pro nobis susceptæ paupertatis : nam qui domum in vita non habuit, post mortem quoque in alieno sepulcro reconditur, et nudus existens a Josepho operitur. (*Theophylactus.*)

III. — Ibi ergo propter Parasceven Judæorum, quia juxta erat monumentum posuerunt Jesum. (*Joan. XIX. 42.*)

Dies erat Parasceves, et sabbatum illuminabat. (*Luc. XXIII. 24.*)

Acceleratam vult intelligi sepulturam ne advesperasceret, quando jam propter parasceven, quam coenam puram Judæi latine usitatius apud nos vocant, facere tale aliquid non licebat. (*Augustinus.*)

Nunc etiam quodammodo Christus apud avaros mortificatur in paupere famem paciente. Esto ergo Joseph, et tege Christi

nuditatem; non semel sed jugiter in tuo tumulo spirituali considerando reconde, cooperi, et misce myrrham et aloem amari-
cantia, considerando vocem illam : (*Matth. XXV.*) " Ite maledicti in ignem aeternum" quo nihil amarius aestimo.

MEDITATIO CCCXIX.

Pietas mulierum erga Jesum
defunctum.

I. — Subsecutae autem mulieres, quæ cum eo venerant de Galilæa, viderant monumentum. (*Luc. XXIII. 22.*)

Erat autem ibi Maria Magdalene et altera Maria (Maria Joseph, *Marc. XV. 47.*) sedentes contra sepulcrum. (*Matth. XXVII. 61.*)

Postquam autem corpus Domini sepul-
tum est, ceteris ad propria remeantibus,
solæ mulieres, quæ eum arctius amaverant,
perseveraverunt, et diligent cura notave-
runt locum in quo corpus Domini ponere-
tur; quatenus congruo tempore munus suæ
devotionis ei offerrent. (*Remigius.*)

Mater autem filiorum Zebedæi non scri-
bitur sedere contra sepulcrum, forsitan enim usque ad crucem pervenire potuit.
Istæ autem quasi majores in caritate, neque

his quæ postea gesta sunt defuerunt. (*Ori-
genes.*)

II. — Et adspiciebant ubi poneretur.
(*Marc. XV. 47.*) Et quemadmodum po-
situm erat corpus ejus. (*Luc. XXIII. 22.*)

Postquam enim Joseph, sepultura per-
fecta, monumento egressus esset cum suis,
concessit mulierum pietati, ut et ipsæ ingre-
derentur, viderentque ubi ac quo modo se-
pultus esset Jesus, et distulit tantisper advol-
vere saxum ostio monumenti. Mens autem
mulierum erat ut et ipsæ, exacto Sabbato,
ungerent Jesum. (*Natalis Alexander.*)

Quod usque hodie, sanctæ mulieres, idest
humiles animæ sanctorum, in hoc sæculo
faciunt, et pia curiositate attendunt quem-
admodum passio Christi completa sit. (*Re-
migius.*)

III. — Et revertentes paraverunt aro-
mata et unguenta : et sabbato quidem
siluerunt secundum mandatum. (*Luc.
XXIII. 26.*)

Neque tamen fidem debitam adhuc habe-
bant; sed quasi puro homini aromata et
unguenta parabant more Judæorum, qui ta-
lia exhibebant defunctis. (*Theophylactus.*)

Sepulto enim Domino, quamdiu licebat
operari, idest usque ad solis occasum, un-
guentis præparandis erant occupatae. Man-

datum autem erat ut sabbati silentium, idest quies, a vespera usque ad vesperam servaretur. (*Beda.*)

MEDITATIO CCCXX.

De custodia sepulcri.

I. — Altera autem die, quæ est post Parasceven, convenerunt principes sacerdotum, et pharisæi ad Pilatum.

Dicentes : Domine recordati sumus, quia seductor ille dixit adhuc vivens : Post tres dies resurgam.

Jube ergo custodiri sepulcrum usque in diem tertium : ne forte veniant discipuli ejus, et furentur eum, et dicant plebi : Surrexit a mortuis : et erit novissimus error pejor priore. (*Matth. XXVII. 62, 63, 64.*)

Principes autem sacerdotum, licet immensum facinus in nece Domini perpetraverint, tamen non sufficit eis nisi etiam post mortem ejus conceptæ nequitiae virus exerceant, famam ejus lacerantes, et quem innocentem sciebant, seductorem vocant. (*Rabanus.*)

Sicut autem Caiphas ignorans ante prophetaverat dicens : (*Joan. XI.*) " Expedit unum hominem mori pro populo, et non

tota gens pereat." Sic modo : seductor enim erat Christus : non a veritate in errorem mittens ; sed a falsitate in veritatem, a vitiis ad virtutes, a morte ad vitam dicens. (*Rabanus.*)

Vide etiam qualiter nolentes concertant ad demonstrandam veritatem : irrefragabilis enim demonstratio resurrectionis facta est per ea quæ prætenderunt : quia enim custoditum est sepulcrum, nulla fraus facta est. Si autem fraus facta non est, manifeste et irrefragabiliter Dominus surrexit. (*Chrysostomus.*)

II. — Ait illis Pilatus : Habetis custodiā, ite, custodite sicut scitis. (*Matth. XXVII. 65.*)

Quasi dicat : Potestatem vobis facio, ut acceptis militibus, sepulcrum custodiatis ut vultis, et ea diligenter quæ vobis necessaria, aut opportuna videtur. (*Menochius.*)

III. — Illi autem abeuntes, munierunt sepulcrum, signantes lapidem cum custodibus. (*Matth. XXVII. 66.*)

Non autem permittit Pilatus solos milites sigillare : si enim soli milites sigillassent : possent dicere quoniam milites permiserunt quod discipuli corpus Domini furarentur, et ita resurrectionis infringere fidem : nunc hoc dicere non possunt, cum ipsi net sepulcrum sigillassent. (*Chrysostomus.*)

MEDITATIO CCCXXI.

Milites sepulcri custodes pecunia corrupti, mentiuntur Christi redivivi corpus furto sublatum.

I. — Quidam de custodibus venerunt in civitatem, et nuntiaverunt principibus sacerdotum omnia, quæ facta fuerant. (*Matth. XXVIII. 11.*)

Signorum quæ circa Christum apparuerunt, quædam fuerunt orbi terrarum communia, puta tenebrae; quædam propria militibus custodientibus, sicut mira Angeli apparitio et terræ motus, quæ propter milites facta sunt ut stupeant, et ab ipsis fiat testimonium veritatis: veritas enim e contrario divulgata magis resulget: quod et contigit.

II. — Et congregati cum senioribus consilio accepto, pecuniam copiosam dederunt militibus.

Dicentes: Dicite quia discipuli ejus nocte venerunt, et furati sunt eum, nobis dormientibus.

Et si hoc auditum fuerit a præside, nos suadebimus ei, et securos vos faciemus. (*Matth. XXVIII. 12, 13, 14.*)

Principes ergo sacerdotum qui debuerant converti ad pœnitentiam, et Jesum querere

resurgentem, perseverant in malitia, et pecuniam quæ ad usus templi data fuerat, vertunt in redemptionem mendacii; sicut et ante triginta argenteos inde dederunt proditori. (*Hieronymus.*)

Per quæ resurrectionem obumbrare conantur, per haec eam faciunt clarere. Dicentes enim quod discipuli furati sunt, confitentur non esse corpus in sepulcro; furtum autem ostendit esse mendax custodia militum et discipulorum pavor. (*Chrysostomus.*)

Ne autem timore principis a mendacio revocarentur, timentes propter negligentiam puniri, subdunt: et si hoc auditum fuerit a præside, nos suadebimus ei, et securos vos faciemus. (*Glossa.*)

III. — At illi, accepta pecunia fecerunt sicut erant edocti. Et divulgatum est verbum istud apud Judæos, usque in hodiernam diem. (*Matth. XXVIII. 15.*)

Vide omnes corruptos. Pilatus enim ipse persuasus est, plebs judaica commota est, milites corrupti sunt. Si pecunia apud discipulum tantam habuit virtutem ut eum faceret magistri proditorem: non mireris si pecunia milites superantur. (*Chrysostomus.*)

Apud Judæos quidem divulgatum est (verbum istud) non apud Christianos; quod enim in Iudea, Judæus obscurabat auro, fide toto claruit in mundo. (*Chrysostomus.*)